

四庫全書

史部

欽定四庫全書

平定準噶爾方略前編卷十五

雍正二年冬十月癸酉

靖逆將軍富寧安疏報吐魯番等處屯田收穫
麥糜五千五百四十石有奇奏入得

旨下部知之

命議叙勦撫花海子功賞卹有差

上諭兵部曰奮威將軍岳鍾琪具奏副都統達鼐阿爾

什總兵黃喜林王嵩孫繼宗營總蘇圖等統領大兵窮追羅卜藏丹津直至花海子拿獲丹津琿台吉及其妻子並招撫三十三家台吉當此口外水凍草枯之候官兵奮勇遠行甚屬可嘉自大將軍以下著從優議叙官兵勞苦朕甚憫之一切馱載輜重馬駝亦多損傷著查明免其賠補其軍營馬匹如有倒斃亦令領帑購買補數再馬兵每名賞銀八兩步兵每名賞銀六兩蒙古兵有隨軍効力者亦著舊威將軍按

其行走効力等次應如何賞給之處確議奏聞

己丑

以甘肅巡撫綽奇為工部尚書仍留肅州辦理
軍務

辛卯

振武將軍傅爾丹疏報烏蘭古木等處屯田獲
麥四千一百七十石有奇奏入得

旨下部知之

乙未

賜給厄魯特多羅郡王額駙阿寶游牧地

阿寶奏言自我祖顧實汗歸誠內附百年於今
受

聖祖仁皇帝厚恩安土樂業前者青海兄弟部內阻兵
構亂上干

天討臣等當束身同受誅滅重荷寬宥令安游牧感激
莫報乞於青海賜臣間曠之地居住臣當約束

青海諸部不敢復萌亂心理藩院議曰阿寶父
巴圖爾額爾克濟農和羅里自青海來歸封之
貝勒阿寶襲封後以平定西藏有功晉封郡王
應如玉所請有貝子丹衷所居地甚寬濶即令
阿寶駐牧并令大將軍年羹堯遣官齎餉助其
移徙安插奏入

上從之

增設寧夏各官

撫遠大將軍年羹堯奏言寧夏駐劄滿洲兵丁處請設一將軍二副都統四滿洲協領二蒙古協領每旗二滿洲佐領一蒙古佐領每佐領下一防禦一驍騎校八旗共撥駐防兵二千二百又八旗應撥步兵一千二百令監守城池倉庫左右兩翼增設兩防禦管轄步兵擇馬甲中健者令為前鋒再寧夏既駐滿洲兵應設一理事同知奏入

上從之

丁酉

封厄魯特多羅郡王和碩額駙阿寶之姪協理
台吉恭格喇卜坦為輔國公

己亥

上諭兵部曰川陝進藏出口一應用兵之處倒斃騎馱
馬匹著悉免賠補

十一月庚戌

議遣赴寧夏官兵事宜

上命加賞銀兩有差

八旗滿洲蒙古都統等遵

旨議奏曰寧夏道遠方今遣往官兵各給車糧如例外
其驛一站率百里今請改八十里為一站駐防
兵丁各養官馬二匹兩丁共養駱駝一隻今兵
丁既以家屬往請增馬一匹共給三匹到時仍
令飼養二匹凡給與馬各折銀十三兩令其自

置由殺虎口過鄂爾多斯進橫城口再遣理藩
院章京二人於鄂爾多斯東西界各駐一人禁
止蒙古盜竊約束兵丁所用口糧約四十日自
京支給二十日糧至大同再給糧二十日馬匹
各給草束纛旗令工部給予礮四十位令大將
軍年羹堯辦給明年四月分八旗為八隊兩日
一隊啟行奏入得

旨兵丁往口外行走收拾帳房鑼鍋等物須得費用寬

裕馬甲每人著加銀三十兩步甲每人著加銀十五兩賞給

庚申

命賞給布隆吉爾撤還滿洲蒙古索倫官兵銀兩有差

乙丑

議叙平定青海及擒獲桌子山碁子山番賊功
加大將軍年羹堯一等男世職

十二月辛巳

議叙進藏軍功

一等男兼雲騎尉明保加一雲騎尉授為三等
子一等男滿色加一雲騎尉授為一等男兼雲
騎尉一等輕車都尉魯爾金加一雲騎尉授為
一等輕車都尉兼雲騎尉騎都尉兼雲騎尉邁
徒加一雲騎尉累授為三等輕車都尉騎都尉
博思和爾加一雲騎尉雲騎尉廣西五十一並
加一雲騎尉累授為騎都尉副都統吳禮布寶

色覺羅伊禮布許國桂侍衛納秦營總郭柱雙
寶四哥貝和諾穆爾泰塞爾圖蔡玉阿爾善西
第黑色覺羅都什希窩黑德四格物寶來寶茂
奇塔特阿克敦色楞阿蘭泰圖閔楊藻薩木哈
顧魯什喜卜達爾扎都斯噶爾扎木巴拉色勒
木素舒木努唐吉禮永寶岳寶穆克登烏林帕
戴寶柱新泰黑雅圖托木蘇魏善三碩色章巴
什敦濟納拉錫泰偏圖並授為雲騎尉

授鄂賴為一等輕車都尉

吏部奏言理藩院侍郎鄂賴奉

旨以取藏功給與雲騎尉鄂賴已為二等輕車都尉累
功當授為一等輕車都尉奏入

上從之

壬辰

命以丁壽為叅贊穆克登為將軍花善為副都統

上諭總理事務王大臣等曰丁壽已授為鎮守茂岱察

罕庾爾等處地方將軍但伊漢仗雖好識見不足此處將軍乃管束邊境初駐兵丁且與喀爾喀一處居住職任緊要著丁壽以都統銜授為叅贊其應補授將軍之人爾等議派三員再此處駐防兵內有蒙古兵丁應派蒙古副都統管轄爾等亦議派三員具奏尋議曰茂岱察罕庾爾等處將軍擬遣振武將軍傅爾丹護軍統領覺羅佛倫歸化城都統丹津管轄蒙古兵丁副都統擬遣察哈爾總管哈

濟噶爾達什鑲白旗蒙古叅領諾爾布扎木素
伏候

欽定奏入得

旨巴里坤軍營前鋒統領穆克登著補授鎮守茂岱察
罕廋爾等處地方將軍令其馳驛來京理藩院侍郎
花善著授為副都統管轄鎮守蒙古兵丁

雍正三年春正月戊辰

命都統查克旦往甘州

上諭兵部曰朕前降旨甘州延信之缺著阿林前往今策妄阿喇布坦之使將到阿林不甚威重著都統查克旦前往甘州居住可賞銀二千兩令其速行料理馳驛前往

二月己巳朔

以布隆吉爾為安西鎮設總兵官一員標下五營遊擊守備各一員千總十員把總二十員兵五千名以陝西神木副將孫繼宗為安西總兵

官

丙子

命衮泰額爾錦赴富寧安軍

上諭總理事務王大臣等曰穆克登已經召回副都統
鄧奇章病故都統穆森年齒稍邁將軍富寧安處大
臣甚少朕調衮泰來京俟其到日授為護軍統領同
副都統額爾錦前往富寧安處聽其指麾行走

戊寅

命工部侍郎巴泰內閣侍讀學士雙喜辦理阿爾台糧

餉屯田事

己卯

以副將張成隆協辦四川提督事

上諭總理事務王大臣等曰署四川提督護軍統領納
秦不甚熟練綠旗兵丁之事調察木多駐劄之化林
副將張成隆協同納秦辦事察木多兵丁著年羹堯
派員前往管轄

甲申

特賜靖逆將軍富寧安及提督路振聲帑金并賞給弁
兵等有差

上諭富寧安曰軍興以來已經數載爾在軍前効力小
心謹慎提督路振聲係初次派往之人在邊地効力
已久現今策妄阿喇布坦之事未完又不便撤兵若
以兵丁久戍之故即令更換轉令伊等軍前數年勞
績有初鮮終矣但爾等在外年久甚厯朕懷今特賞

帑金二十萬兩內給將軍二萬兩提督五千兩其餘
按弁兵効力年分以為賞賜之等次綠旗兵丁向係
輪班行走伊等作何賞賜之處爾會同路振聲商酌
所賞銀兩著行文年羹堯動西安庫帑派賢能官員
解送賞給

己丑

諭飭撫遠大將軍年羹堯

上諭年羹堯曰據岳鍾琪奏稱青海郡王額爾德尼額

爾克托克托鼐所屬部落窮困流離資生窘乏親王
戴青和碩齊察罕丹津等所屬部落雖稍能存活亦
屬貧窮爾身為撫遠大將軍凡西陲軍務調發糧餉
綏輯遠人皆爾之責理應酌量事勢緩急人口多寡
盡心籌畫辦理乃僅發銀一萬兩賑濟此諸部落流
離失所之衆豈萬金所能徧給是知爾於諸務皆未
實盡其心矣托克托鼐等遭叛賊搶奪投命來歸全
賴安插得所俾其衣食有資今爾既不能籌畫於未

然又不克拯濟其現在如諸部落內或有一二人窘
急萬難自存潛逃遠匿竄入策妄阿喇布坦之地者
朕必重治爾罪

癸巳

命奮威將軍岳鍾琪等各舉勦賊弁兵入奏

上諭大學士等曰進勦青海桌子山等處兵弁其人材
可觀技勇優長者著將軍岳鍾琪揀選保奏守備二
員千總二員把總二員馬兵四名總兵官黃喜林王

嵩紀成斌宋可進孫繼宗每人保奏守備一員千總
一員把總一員馬兵四名文到限三日書名報部候
旨調來引見錄用

三月辛丑

命康濟鼐兼領西藏及阿里事

上諭撫遠大將軍年羹堯曰爾欲令康濟鼐駐劄西藏
所議雖是但康濟鼐居住阿里地方亦甚緊要不知
康濟鼐情願與否且與阿爾布巴隆布鼐等彼此能

和睦與否今令康濟鼐為總領帶領伊屬下唐古忒
往居西藏阿爾布巴等倘有不服康濟鼐孤身在彼
雖欲効忠勢必不能朕意康濟鼐仍兼兩處往來行
走似有裨益若令康濟鼐居住西藏伊即欲往阿里
地方照管亦不可得此事極宜斟酌如以康濟鼐兩
處行走為是康濟鼐往阿里地方去後令何人居住
西藏總領辦事著會同侍郎鄂賴詳慎妥議辦理尋
議曰康濟鼐應遵

旨於招地及阿里兩處往來若康濟鼐往阿里其招地
事務即令貝子阿爾布巴總理奏入

上從之

乙巳

議駐防塔拉渡川及先密寺設官調兵事宜

川陝總督年羹堯疏言臬子碁子諸山為匪人
潛匿之藪相度形勢惟塔拉渡川東通莊浪西
接刀林先密寺四圍皆山林木茂密盜賊輒由

此路出沒應於塔拉渡川有水處設一遊擊一
千總二把總騎兵步兵共五百人即移涼州高
古城遊擊等官率兵駐防先密寺請設一守備
一把總騎兵步兵共三百人即移高溝堡守備
黑松堡把總率兵駐防兵部議覆如所請奏入
上從之

丁未

議打箭爐外增汰兵丁事宜

議政王大臣等議奏大學士馬齊自內捧出奏摺一件奉

硃批此奏殊屬可嘉實為國家專心盡忠此所奏之人名暫且不可明揚朕務必加恩著議政王大臣詳加速議具奏臣等遵

旨議得條奏稱前大將軍年羹堯所陳善後十三事其一言打箭爐以外木雅等處當增設兵六千議汰四川重慶川北二鎮化林一協及遵義諸營

兵三千四百人按化林為打箭爐扼要關隘
若使額兵千人止留五百人又分二百人守打
箭爐則四川之西邊兵勢弱矣重慶總兵官標
下額兵二千重慶地屬四川沿大江據湖廣荆
州之上流若汰總兵官及兵千人則四川東邊
兵勢弱矣至川北總兵官駐保寧額兵二千四
川保寧與陝西漢中相為犄角若保寧總兵官
及兵千人并汰之則四川之北邊兵勢弱矣往

者於兩省接壤之處相其地勢多設兵丁者欲
令互相聲援且防察諸省盜賊也應請於內地
所設官兵悉留之如故再打箭爐至巴塘九百
里今以內地官兵六千置邊外何以使不侵擾
打箭爐土司諸部落及里塘巴塘之番人至番
地產青稞不產米穀內地官兵習於穀食其輓
輸米糧建造城屋當如何並未詳議請仍令年
羹堯確議具奏應如條奏所請年羹堯議汰之

川北重慶化林諸鎮及遵義協巫山達州二營
經制官兵悉設立如故又年羹堯奏請打箭爐
外增兵六千黃勝關外潘州等處增兵二千四
百所增兵過多口外撥餉既不易或致騷擾諸
番今川北等處兵汰之既不便請於所議設二
處兵八千四百人減二千五百餘兵尚五千九
百人亦宜酌量汰減請今年羹堯於汰減兵丁
及輓運糧米建造城屋諸事分晰具奏到日再

議奏入

上從之

夏四月丙子

議徙吐魯番回人等於內地

上諭議政王大臣等曰策妄阿喇布坦來求吐魯番之地曾諭將從前內附諸酋長令其遷入內地今將軍穆克登奏言吐魯番處共有一萬餘人若但遷首領數人而不遷其所屬之人則伊等生計必致艱難且

伊所屬內願移入內者不下四五千人等語朕思瓜
州沙州地方甚寬亦必用人耕種若有願移者即在
此居住給與一二年養贍令其耕種羅卜淖爾地方
亦照吐魯番例有願移來者亦隨所部酋長一併移
來不願者仍留本處著議奏尋議曰回人歸附者若
更棄與策妄阿喇布坦必致擾累是以願移者
衆請令來者於布隆吉爾沙州瓜州等處耕種
其建置村莊養贍得所令將軍富寧安等詳議

辦理再羅卜淖爾回人並水居打魚自活其中
有願陸居者請如吐魯番例令其移來奏入
上從之後富寧安奏言回人願遷入內地者凡六百五
十人應給與馬駝帳房等物奏入報

聞

己卯

遣內閣學士衆佛保副都統扎什等往準噶爾
敕諭策妄阿喇布坦

上諭曰前歲台吉遣使根敦陳奏情詞恭順朕實嘉之
曾遣使答諭今覽爾使博羅瑚爾噶齋奏及口奏之
詞知爾仰副朕旨欲永息兵戈共修和好興教逸民
出自誠心朕甚欣悅顧欲修和好不可不計久遠議
定疆界以杜爭端乃垂久遠之道也朕去歲遣使與
爾定議疆界大概以阿爾台山嶺為界原未實指地
名今爾奏稱以唐努山陰之克木克木齊克地方為
詞又有哈噶斯地方係喀爾喀厄魯特之界哲爾格

西喇呼魯蘇地方係會集之所哈濟爾地方係索林
齊居住等語此爾但陳奏其故並未執意爭求應無
庸議外今姑以科卜多烏蘭古木等處言之喀爾喀
厄魯特未構兵時原混雜住牧今喀爾喀西境直抵
阿爾台山嶺築城種地自唐努山陰之克木克木齊
克至博木地方現有策凌旺布博貝烏梁海居住今
定疆界自洪郭壘至阿爾台哈道里嶺此千里內所
有巴斯庫斯索羅斯畢汗和屯阿爾呼特阿勒坦淖

爾等處為爾疆界自哈道里以及克木之博木地方
為我疆界自哈道里以南由山嶺至額爾齊斯西邊
自烏隆古布拉克塔克拜塔克直抵烏蘭烏蘇
羅卜淖爾噶斯地方即係沙磧應自克勒底野以南
定為我國疆界朕為元后統一寰宇爾所請可行無
不俞允豈為叢爾廢地致啟爭論不過欲明疆界永
結和好耳再爾又奏稱爾使臣貿易之人若由內地
往來途遠勞苦請由喀爾喀地方行走朕今照爾所

請但人數不可過三百耳嗣後惟當不渝前好以信
為本普濟蒼生爾其思之特諭

戊子

命議開鄂爾昆圖拉屯田

上諭振武將軍穆克登曰喀爾喀地方駐兵年久每年
由京城運送軍糧路途遙遠一時不及恐兵丁至於
乏食鄂爾昆圖拉一帶甚為寬濶若開墾屯田實為
永遠之計爾會同喀爾喀將軍等確議具奏尋穆克

登奏言鄂爾昆一帶尚有昔人耕種處及故渠
灌田踪跡圖拉等處現有大麥小麥非不可墾
之地也但霜降早晚不一樹穀宜否不齊請於
屯長中擇十餘人於明年三月遣往耕種俟秋
收後具奏議政王大臣等議覆如所請奏入

上從之

庚寅

議敘平定西藏功

一等子納穆扎卜加一雲騎尉二等子多爾濟
加一雲騎尉並累授為一等子三等輕車都尉
卓爾和覺羅佛保並加一雲騎尉累授為二等
輕車都尉騎都尉格勒爾圖留保寶色東吉納
並加一雲騎尉世職章京納孫泰德成查代法
喀席蘭泰烏雲寶雅起納阿爾善代綬並授為
雲騎尉世職故署護軍叅領傅達里章京常綬
珠其布護軍校哲庫訥並給一雲騎尉令其子

承襲

丙申

議定青海諸部互市地

奮威將軍岳鍾琪奏言大將軍年羹堯前奏稱
每年青海與內地定於二八月貿易以那喇薩
喇為交易所經議政大臣議改令四季交易甚
便按親王察罕丹津公拉察卜等諸台吉部落
並居黃河之東迫近河州去松潘不遠向在河

州松潘二處貿易今若定於那喇薩喇恐黃河
東西兩翼蒙古所居有無不足供給不如仍於
河州松潘貿易為便河州定於土門關附近雙
城堡松潘定於黃勝關之西河口二地並有城
堡房屋地形寬濶水草豐好可為永遠互市之
所又郡王額爾德尼額爾克托克托鼐郡王塞
卜騰扎爾等諸台吉部落在黃河西近西寧請
移其貿易地於西寧口外丹噶爾寺至蒙古貿

易悉資牲畜請於每年六月以後可母定期聽
其不時貿易則蒙古商販並獲利益議政大臣
等遵

旨議覆岳鍾琪所奏周詳應如所請奏入
上從之

五月戊申

撤鹽池駐防兵

撫遠大將軍年羹堯奏言臣在西寧時以邊外

克羅冲博克所屬鹽池青海蒙古部人輒運鹽
入邊貿易西寧軍民賴之臣奏設一副將駐兵
一千六百令西寧通判移駐管理鹽務現今郡
王額駙阿寶移居克羅冲博克如官兵仍駐劄
其地恐滋事應請罷臣原議其通判亦汰之怡
親王允祥等遵

旨議覆應如所請奏入

上從之

丙辰

諭飭年羹堯遣送輝特台吉濟克濟扎卜移牧事

理藩院奏言振武將軍傅爾丹咨稱輝特台吉
濟克濟扎卜自西喇塔拉移牧就其族公巴濟
大將軍年羹堯遣人送之出口即還道途勞困
人畜憊斃乞賜軫恤應許其與公巴濟同居俟
其屬人悉至再議編設佐領奏入得

旨輝特台吉濟克濟扎卜之事年羹堯止用密摺具奏

並未報部亦無行文與將軍傅爾丹及該扎薩克等
但交與章京一員送至口上即回將此多人致此勞
苦謬亂已極著年羹堯明白回奏

已未

命撤巴里坤等處駐守官兵

上諭議政大臣等曰策妄阿喇布坦遣使具奏言辭敬
順巴里坤等處兵丁在外年久將吐魯番等處駐劄
兵丁俱撤到巴里坤會合一處著照吐魯番烏隆吉

科舍圖等處撤兵之數撤回再吐魯番地方揀選能員一人令其駐劄候我使臣歸國著行文將軍富寧安撤兵時吐魯番回人未免怯懼將策妄阿喇布坦敬謹遣使及命使臣前去不必用兵緣由曉諭回人俟使臣來時其回衆移居之處照從前所降諭旨行著議奏尋議曰巴里坤吐魯番科舍圖烏隆吉四處計兵九千八百餘吐魯番兵中有種地兵千人可暫留之令副都統克什圖管轄餘丁如巴里

坤所有兵數暫留巴里坤駐劄餘悉撤之奏入
得

旨克什圖年老著留穆森一同管轄其留駐巴里坤之
大臣及統領撤兵之大臣著將軍富寧安酌量派出
奏聞尋靖逆將軍富寧安疏言乃者策妄阿喇布坦
既遣使入朝甚屬恭順巴里坤等處所有兵丁
實無可用應行撤回除遵

旨酌量留駐外其吐魯番等處所有護軍令副都統智

勇薩爾禪等率回西安前鋒令委署副都統登
德禮率回已於八月初二日自巴里坤啟行其
各路綠旗兵丁悉令提督路振聲率回應請飭
部所有撤回官員兵丁據冊核明行知各旗各
營管轄如故奏入

上從之

平定準噶爾方略前編卷十五

欽定四庫全書

平定準噶爾方略前編卷十六

雍正三年六月戊辰

議叙駐藏官兵

上諭兵部曰陝西四川雲南進藏官兵朕從前俱已加恩議叙其康熙五十九年得藏之後四川雲南兩省官兵駐防藏內及察木多各處地方者久著勤勞甚屬可嘉至今尚未議叙爾部行文岳鍾琪高其倬各

將駐防官兵查明報部交與議政處即行議叙

庚午

署川陝總督岳鍾琪奏定雜谷大小金川沃日
諸土司地界

岳鍾琪疏言臣遵

旨遣官到雜谷大小金川沃日等處勘問諸土司構釁
狀立界如故人人悅服又金川土司美同諸寨
為金川咽喉前巡撫年羹堯強判與沃日是以

讐殺累年今仍歸之金川以龍堡三歌地歸沃
日兩家息爭又土司承襲所在有司索取陋規
輒延歲月請立嚴限以杜弊竇奏入得

旨本朝各省土司俱畏威懷德甚為恭順間有一二梗
化者皆由地方文武大吏調劑失宜之故今春年羹
堯奏稱四川雜谷及大小金川等土司頗有不法情
狀朕即知此必年羹堯希冀其多事欲借此名色得
以久操大將軍之權固留川陝總督之任耳年羹堯

若不速離川陝則川陝必致多事是以將年羹堯調往杭州未幾南坪壩之事果已安帖茲據岳鍾琪所奏雜谷金川沃日等土司又已悅服彼此和輯矣此諸土司向日皆因年羹堯辦理不公以致互相讎殺今岳鍾琪遵朕諭旨辦理有方寧番息事殊屬可嘉著交與該部議叙其條奏土司襲職之處著內閣九卿會議具奏

己丑

敕詰年羹堯鎮海堡軍情

上諭大學士等曰前據年羹堯摺奏鎮海堡城外之戰
我兵已將賊人殺敗城內都統武格帶領滿兵及察
哈爾兵開城西門尾追賊後搶掠物件以致賊人折
回斫傷西安驍騎校一員滿兵一名察哈爾兵二名
武格首先敗回又復衝突綠旗隊伍致鎮海營千總
與兵卒帶傷者十有餘人其餘行事昏愎不知羞恥
西倫圖輕浮妄言狂叫無禮皆軍事所最忌者臣是

以即行撤回等語朕比時即批示令其具本叅奏隨據年羹堯奏稱都統武格西倫圖本應叅劾然臣之受恩威權太重若再叅兩都統於臣不利伏乞暫賜優容置之閒散之地等語朕是以將武格西倫圖調回令其別處効力今據護軍叅領常明奏稱羅卜藏丹津侵犯康城邊界時年羹堯令臣到鎮海堡送信與都統武格武格隨帶西安滿兵一百名察哈爾兵三百八十名入守鎮海堡凡四晝夜至第五日今陞

總兵之宋可進帶西寧綠旗兵一千五百名來赴臣
與都統武格叅將張家翰同率在城滿洲蒙古綠旗
兵丁六百餘名出西門向城下排列與賊戰賊即奔
敗因深入賊壘交戰西安正藍旗驍騎校署叅領四
哥鑲藍旗披甲達三保陣亡正黃旗領催署驍騎校
吳泰等五六人俱數處重傷察哈爾兵亦有陣亡及
受傷者此皆世受國恩遇敵感憤報効死傷之人臣
不敢隱匿謹此奏聞等語常明身在軍前所奏如此

與年羹堯從前所奏迥異且年羹堯既稱武格種種失律之處彼時又不叅劾及朕令其叅奏又云臣威權太重不便又叅兩都統夫行軍之道只論功罪之當否豈可意為輕重且以年羹堯之擅作威福所叅宣止兩都統而至此忽又懼威權太重耶觀常明所奏當日在事官兵奮力殺賊有受傷者有陣亡者深屬可憫武格等既無失律之罪則効力之官兵等應加優卹此案功罪不便含糊歸結著年羹堯明白回

奏

秋七月癸亥

命優賚青海諸王貝勒貝子來覲者

上諭理藩院曰青海和碩親王察罕丹津疏請來京意甚懇切今年郡王額爾德尼額爾克托克托鼐與察罕丹津應輪班來京來時著侍郎鄂賴各賞銀一千兩明年郡王塞卜騰扎爾貝勒益蘇克旺扎爾貝子索諾木達什俱應輪班來京來時王賞銀一千兩貝

勒賞銀八百兩貝子賞銀六百兩

八月乙亥

定軍功加銜兵丁錄用給俸之法

兵部等衙門遵

旨議奏曰

皇上以立功加銜外委兵丁匱乏可念令臣等確議錄用給俸之法謹條列奏

聞一康熙三十年以前兵丁加銜或多假借毋庸送部

推用其近年以來克取打箭爐恢復西藏臺灣
及平定逆番諸有功者計四千人應令督撫提
鎮轉下營協州縣所有兵丁三代履歷年貌籍
貫開載明白各加印結造冊分送部科存貯以
杜假借一前者議叙功冊中或多徇私濫入應
敕督撫提鎮令領兵將校及同事在職各官出
具功績有無印結送部以杜冒濫一以功加遊
擊都司銜者歸於雙月推用如例其加守備班

向已汰去現今加守備者幾至二千餘人請於
雙月單月增設功加守備一班一各省把總缺
三人以加銜者一人補用如缺二人仍於所在
兵丁拔補一向者立功授劄後悲令除所支糧
或無生業以致窮困失所嗣後未得補用者悲
令督撫提鎮收置標下其給糧兵丁等勤慎者
則以外委把總銜給之老病者奏給半餉終其
身一實在立功同役同銜者再令督撫提鎮考

驗分三等送部引

見分別補用以杜奔競請托之弊如此則立功加銜者

錄用有日咸荷

聖恩矣奏入

上從之

丁亥

青海固山貝子策零敦多卜卒以其子丹巴襲

爵

九月丙申

川陝總督岳鍾琪奏請陞

見

允之以西安巡撫圖理琛署理總督事務尋加岳鍾琪

兵部尚書銜

庚戌

領侍衛內大臣公傅爾丹奏率京兵還

傅爾丹奏言振武將軍印信已交代將軍穆克

登其喀喇沁土默特兵令協理旗務塔布囊沙
津達賴台吉塞楞拉什領之歸化城土默特兵
令叅領常保佐領三都布綽斯希領之各還所
在臣由鄂勒錐圖郭勒啟行率京城官兵赴京
奏入報

聞

壬子

靖逆將軍富寧安疏報塔勒納沁等處屯田收

獲青稞八千九百三十二石有奇奏入得

旨下部知之

冬十月己巳

命賞賚進藏官兵

上諭內閣曰四川提督周瑛從前領兵進藏時正值天氣寒冷又當匆遽之際弁兵甚屬勤勞朕心深為軫念周瑛回至四川之日著巡撫王景灝動支司庫銀一萬兩交與周瑛將隨往進藏及察木多効力之弁

兵等按其勞績分別等次通行賞賚俾遠征奮力之人得霑恩賜

戊寅

議設烏鎗隊長

前鋒統領鄂善奏言請於前鋒兵丁中以其半為烏鎗前鋒八旗各擇能者四人管轄如副護軍校例給與藍翎令為烏鎗前鋒之長奏入得

旨前鋒等偵探信息伺捉賊人恐攜帶鳥鎗有不便之

處著八旗都統等會同前鋒統領護軍統領議奏尋
議曰烏鎗為軍中利器凡行伺捉賊人不得帶
平時令之演習無所不便可令前鋒中半習烏
鎗擇能管轄者四人為隊長演習暇時仍令前
鋒統領叅領侍衛等訓練騎射不得生疎奏入
上從之

辛巳

命給喀爾喀上三旗旗纛

喀爾喀副將軍多羅郡王和碩額駙策凌等奏
言喀爾喀三部兵舊分隸八旗今蒙

恩許隸上三旗乞下工部令製鑲黃旗纛六十桿腰旗
六百桿給丹津多爾濟軍正黃旗纛四十二桿
腰旗四百桿給策凌軍正白旗纛三十桿腰旗
三百桿給博貝軍理藩院遵

旨議覆如所請其舊有八旗旗纛令交將軍穆克登收
貯奏入

上從之

庚寅

靖逆將軍富寧安疏報吐魯番等處屯田收穫
麥糜六千九十石有奇奏入得

旨下部知之

十一月乙未

正中甸里塘巴塘諸地疆界

川陝總督岳鍾琪奏言打箭爐界外里塘巴塘

乍了察木多雲南之中甸察木多以外魯隆宗
雜哇坐爾剛桑噶吹宗袞卓諸部落悉非達賴
喇嘛所屬但魯隆宗去打箭爐甚遠若歸併內
地遙制不便請以凡屬內地土司所轄中甸里
塘巴塘及沿近得爾格特瓦舒霍耳等處並為
內地其頭目給以土司官銜令其管轄其魯隆
宗諸部落請給予達賴喇嘛管理特遣大臣往
西藏宣諭又康濟集阿爾布巴既封貝子管理

西藏事務請令康濟鼐總理以阿爾布巴副之
頒給

敕諭曉諭唐古忒部人悉聽二人約束庶無擾亂之患
至前者年羹堯請於噶達設總兵官駐劄若以
魯隆宗諸部給達賴喇嘛則噶達所設總兵官
可罷之議政王大臣議悉如所請奏入得

旨畫定內地疆界給與達賴喇嘛地方曉諭番人之事
著遣副都統宗室鄂齊學士班第扎薩克大喇嘛格

勒克綽爾濟前往會同提督周瑛詳細辦理尋岳鍾
琪奏言巴塘為打箭爐門戶舊隸四川省中甸
地近雲南舊隸雲南省其巴塘所屬本咱爾祁
宗拉普維西等處偏近中甸與雲南汛防地界
錯接總會於阿墩子實中甸之門戶請改隸雲
南省管轄設官防汛與四川之里塘打箭爐相
犄角足以各收臂指控制番民矣議政王大臣
等議如所請奏入

上從之

雍正四年春正月甲午

命隆科多往阿爾台嶺等處協定邊界

上諭大學士九卿等曰隆科多深負朕恩種種罪惡應置重典但伊辦事之才尚屬可用現今與策妄阿喇布坦將阿爾台嶺定為邊界之事甚屬緊要差往彼處官員計已將回應預為詳審地勢明晰定議今已派出額駙策凌貝勒博貝散秩大臣伯四格護軍統

領喀爾吉善前去著隆科多一並同往至阿爾台嶺
再由洪郭羅東至楚庫拜姓地方詳察地勢公同定
議具奏再由楚庫拜姓之東額爾古納以至黑龍江
之源舊定邊界亦未清晰俟阿爾台嶺事竣隆科多
即從彼處前往楚庫拜姓將此等地方亦詳審定議
現今俄羅斯國為定邊界之故差使前來隆科多候
伊使臣到日即將定邊界之處會同議結此事隆科
多非不能辦者伊若實心任事思益前愆朕必寬宥

其罪若心懷叵測思欲僨事所定邊界不合機宜於策安阿喇布坦俄羅斯地方生事朕必將伊治罪

二月辛未

賞給青海親王戴青和碩齊察罕丹津等帑金

理藩院以察罕丹津等起程還部日期入奏得旨察罕丹津等既欲於十一日起程著初十日至圓明園陞見伊等俱因青海之亂被賊搶掠此時回去恐牲口盤費不足著將內庫銀各賞給一千兩

甲戌

命編分厄魯特郡王貝勒等佐領

理藩院奏言厄魯特多羅郡王額駙策凌旺布
多羅貝勒塞卜騰旺布貝子茂海等乞一體編
分佐領應遣官前往辦理奏入得

旨此係編分佐領之事甚屬緊要應遣大臣前往今散
秩大臣伯四格等往定阿爾台山邊界事竣之日即
著四格從彼處前往會同副都統花善詳議編分尋

議曰郡王策凌旺布貝勒塞卜騰旺布貝子茂
海俱授為扎薩克其所屬厄魯特可編置四佐
領奏入

上從之

乙亥

議開察罕托輝河渠

公舅舅隆科多等奏言臣等到寧夏阿拉善山
前相視自察罕托輝至石嘴子一百里其野廣

平土脈肥潤籽種易生其地性較暖可引水如
西河六羊河並古渠大溝黑龍口倒流河新河
黃泥河董家河悉前人引水分水故道以年久
多淤塞然形跡尚存今若更修建渠壩及放水
開其兩岸可以墾田萬頃又據甘肅巡撫石文
焯等奏言寧夏東北五十里曰察罕托輝其地
南北延袤百餘里東西廣四五十里或二三十
里東界黃河西至西河地平行可開墾自鄂爾

多斯遷後十餘年民間有私墾者若令開渠通
水築堤建閘以時啟閉用資灌溉則曠土可盡
為沃壤今相度地勢自雙廟墩至六羊河可百
餘里請倣漢唐諸渠法開渠一道建正閘一攔
水閘稍閘各一迎水湃一又六羊河口近黃河
處亦建正閘攔水閘稍閘各一以資蓄洩又自
上泗墩至六羊河岸東距黃河五里許築堤一
道約長百里可以永禦黃水墾田六十餘萬畝

議政王大臣等議覆曰察罕托輝自漢及唐為靈州地當時廣置屯田元至元間置屯田萬戶所明時套夷渡河而西侵據內地葫蘆河之東居民不得耕種實始棄之我

朝德化廣被諸番臣服鄂爾多斯移歸套內以河為界察罕托輝地久隸版圖按寧夏衛志漢唐二渠之支流有百家良田蒲達拉等渠舊在察罕托輝左右若倣其遺跡開渠建閘甚善但隆

科多石文焯等所言建閘築堤處情狀各異事
計久遠臣等不得懸定方今總督岳鍾琪赴布
隆吉爾相視地勢請以隆科多石文焯奏摺並
地圖令大理寺卿通智齋往同岳鍾琪至察罕
托輝等處照圖驗實核議具奏奏入

上從之

臣等謹案黃河自西極數千里始入中國龍
門下流波勢奔怒往往為患然寧夏之西自

昔阻河溉渠漢唐以來號稱沃野史記載武帝時朔方河西並引河及川谷水溉田後漢永建中以虞詡言激河浚渠為屯田唐時曾開濬之為二渠元置屯田萬戶所今察罕托輝漢唐二渠之支流踪跡具在也自明中葉始棄之邊外居民不得就耕其地

國家威德無外式廓版章

世宗憲皇帝特命大臣齋地圖到阿拉善山前相度泉

流求復故道爰發帑金於河西牧場之地經
理勑濬開惠農及昌潤二渠溉田數十萬頃
為萬世利賴我

皇上蕩平絕域西域諸部盡隸中土自是烏魯木齊
以外至葉爾羌喀什噶爾屯耕以次舉行荷
鍤成雲決渠降雨遠至星宿之源穰藁相望
荒陬並登樂利一統無外之

鴻規夫豈漢唐諸代所可倫比者哉

三月辛丑

命撥兵駐劄唐努山特爾等處并

賞諭烏梁海

上諭議政王大臣等曰據遣往策妄阿喇布坦處衆佛保等奏稱策妄阿喇布坦以克木克木齊克烏梁海地方原係伊所屬被丹津喇卜坦侵佔仍欲得此地方等語今不令策妄阿喇布坦來使入內地即於巴里坤地方遣回恐策妄阿喇布坦乘此時發兵侵擾

克木克木齊克烏梁海現今我滿洲蒙古兵丁在茂
岱察罕廋爾扎克拜達里克駐劄著前鋒統領丁壽
帶滿洲兵五百名蒙古兵五百名副將軍貝勒博貝
帶喀爾喀兵一千名前往唐努山前之特斯等形勝
地方駐劄於克木克木齊克居住之策凌旺布烏梁
海居住之博貝處不時偵探若策妄阿喇布坦侵犯
烏梁海等處賊兵若少即襲擊之如賊勢衆斷不可
輕進著將軍穆克登副將軍丹津多爾濟策凌博貝

等應於何處防守預備定議奏聞尋又

諭理藩院曰昨為烏梁海人等特降諭旨發兵駐防朕復詳思克木克木齊克地方之烏梁海人等俱係策凌旺布博貝屬下其來歸之和羅勒買等現交博貝撫綏存恤居之公所此等人向在喀爾喀邊外樹內打牲為生與準噶爾所屬之烏梁海接壤又與俄羅斯連界必當輕徭薄賦俾伊等生計饒裕乃為有益此等人素無知識萬一策妄阿喇布坦設計哄誘或

興兵搶掠雖地屬彈丸人極愚賤而倘被侵犯即與
蒙古王貝勒之部落一體豈可置之不問觀策妄阿
喇布坦奏章其意於烏梁海每飯不忘將來未必無
乘間侵犯之事今茲夏月我師現在特斯等處游牧
朕欲乘此遣大臣一員攜帶布帛茶葉等物同王策
凌旺布貝勒博貝或親至克木克木齊克地方或於
附近烏梁海之唐努特斯等處齊集伊等為首之人
分別賞賜明示朕意曰皇帝軫念爾等民生特命前

來傳旨曉諭爾烏梁海人世居樹內以打牲為生遇
力強者即為納賦由來舊矣今爾等既納貢賦於蒙
古王貝勒等即為朕之屬國所居與俄羅斯準噶爾
邊界甚近據今差往準噶爾使臣回奏策妄阿喇布
坦云克木克木齊克地方之烏梁海人等向俱為伊
之屬下甚恨爾等皇帝恐爾等受伊侵害故特遣大
臣傳諭預為防備且施恩賞賜爾等嗣後遠設營哨
盡心防禦策妄阿喇布坦所屬之烏梁海與爾等接

壤宜不時探察再俄羅斯亦與爾等甚近倘伊國人等侵爾邊界造屋種地立即報知汛地轉報將軍即使策妄阿喇布坦侵害爾等將軍早聞便可發兵救助倘策妄阿喇布坦兵多事起倉猝爾等力不能當即攜帶妻孥牲餼暫移入內邊游牧若賊兵無多爾等酌量已力可以殄滅即殄滅之與其畧不設備致策妄阿喇布坦忽來見侵劫掠牲畜殺傷人民何如早備之為善也皇帝又軫念爾等生計特命爾主王

貝勒等減爾貢賦將所減之數皇帝動支國帑賞賚
爾主期於爾等生計有益爾等誠能感戴國恩恪遵
訓旨固守地方探察詳報朝廷恩賚自必有加無已
等語策凌旺布博貝同命往大臣如此詳悉曉諭伊
等再於伊等中揀選老成服衆之人作為首領令其
守望相助其遇有緊急事務作何知會傳報之處亦
著詳細定議開示伊等伊等果能深知利害感佩恩
澤則必輸誠効力從此邊圉益固矣

夏四月丁卯

命議叙喀爾喀汗旺扎爾多爾濟等

上諭議政王大臣等曰前議於鄂爾昆圖拉地方種地時曾有人奏稱喀爾喀人等未必情願朕思喀爾喀地方原被噶爾丹抄掠窮困已極我

皇考聖祖施恩收養各按伊等品級封為汗王貝勒貝子公扎薩克加以重恩令食俸祿數年間遂致充裕安居原游牧地方今復安插戍兵令其種地亦係特

為喀爾喀護庇久遠之計伊等聞之定各欣喜有何
不願之處朕曾降此諭旨令圖謝圖汗旺扎爾多爾
濟副將軍王丹津多爾濟等感戴為伊等安插兵丁
之恩復因先於額爾得尼招地方開種地畝穀不甚
長遣人從俄羅斯處尋得與伊地方相宜之穀實請
令按時耕種又情願幫助耕種之人口糧等因具奏
與朕前旨相符喀爾喀汗旺扎爾多爾濟王丹津多
爾濟等實係感激深恩為國家竭誠効力之人殊屬

可嘉著交與理藩院議叙

癸酉

撤巴里坤吐魯番官兵撥安西兵駐劄哈密

上諭議政王大臣等曰據差往策妄阿喇布坦處衆佛保等奏稱臣等與策妄阿喇布坦議定疆界仍欲以索勒畢嶺至唐努山陰之喀喇巴爾楚克山為界等語其事暫且不能完結朕思巴里坤吐魯番之兵丁理應撤回著議奏尋議曰策妄阿喇布坦怙惡不悛

輒敢要求定界乃自取滅亡也

皇上愛恤軍士以出征年久令撤巴里坤吐魯番兵應
悉撤之但撤兵後賊或來哈密盜竊馬匹牲畜
亦未可定今哈密駐兵止五百人請更於安西
撥兵五百遣副將遊擊各一人管轄駐劄務遠
斥堠嚴汛防俟哈密築城既畢其兵五百仍撤
回安西將軍富寧安前有

旨令其陞

見即令率所撤兵來京又甘州有京城滿洲兵三百亦
令都統查克旦率之還并撤所設軍站其自嘉
峪關以至安西沙州哈密應留軍站以備遞送
奏入

上從之

五月壬辰

飭諭川陝總督岳鍾琪

岳鍾琪疏言寧夏駐防滿漢兵丁糧餉請分別

折給奏入得

旨從來滿洲兵丁性情質樸奉公守法不知爭論財物
自圖便利亦未聞於該管上司前有控告錢糧等事
昔年福州漢軍駐防兵丁因爭競馬乾錢糧

聖祖仁皇帝將為首之人重懲附和之人分別治罪蓋
恐其漸成惡習故用法以儆將來也每見旗人為上
司往往袒護旗人亦有故意刻待旗人袒護漢人以
示公者漢人為上司又往往袒護漢人亦有故意刻

待漢人袒護旗人以示公者此皆非大公至正之道也朕君臨天下一視同仁惟期事事公平不肯稍有偏向如滿洲駐防兵丁其所得錢糧馬乾等項較綠旗兵丁為多此非厚待旗人也蓋綠旗兵丁係土著之人經營度日稍覺容易滿洲兵丁於錢糧之外無所資藉故特加恩惠以養贍之旗兵既有多得錢糧之處則不應復占綠旗之分例今岳鍾琪奏據鍾保詳稱寧夏滿兵初到採買米石草束實難請將夏朔

二縣實徵草束并額徵一萬五千石之米盡給滿兵以折價給與綠旗兵丁此奏甚屬錯謬若云折價足敷採買之用則綠旗可以採買滿兵即可以採買且地方官亦可以採買矣若云折價不敷則滿兵不敷綠旗兵亦即不敷矣兵丁同為朝廷豢養之人滿洲素性尚義輕財豈肯奪綠旗兵丁之利以自便其私乎據云詢問綠旗兵丁亦欣然樂從凡辦事祇論理之當行與否若於理當行豈因綠旗兵丁不願而遂

停止乎若於理不當行即綠旗兵丁情願固屬可嘉
獨不計及滿洲兵丁之顏面乎又稱所需白米每石
以一兩五錢折價為數無幾等語國家有一定之經
費若屬應用則數千數萬亦不為多若不應用則一
絲一粟亦宜察核豈有因數目不多而遂可任意增
添乎況為數不過七百餘金即將此分與三千人衆
為利幾何而令滿兵徒受與國家較量錙銖之名乎
鍾保身為藩司料理軍餉乃其專責滿洲兵丁所需

米石草束著交與鍾保管理採買散給不得稍有虧缺若偕端貽累地方朕必加重處俟辦理數年兵丁住久熟習之後再行奏聞令兵丁各自採買

冬十月甲子

賞賚擒賊蒙古兵

理藩院遵

旨議覆曰蒙古官兵於布拉罕布魯爾二路襲擊策妄阿喇布坦邊界擒殺賊衆應請分別賞給銀幣

欽定四庫全書

平定回疆方略前編
卷十六

奏入

上從之

十一月乙未

命封靖逆將軍富寧安世襲侯爵

靖逆將軍富寧安自軍營來京率將士陞

見

上諭曰富寧安在軍前多年約束兵丁辦理事務俱井井有條而且行止端方廉潔此數年以來領兵之將

軍等聲名未有出其右者其於我

皇考之寄任實心奮勉不負任使朕實嘉愛今朕代

皇考惟恩特行旌賞封富寧安世襲侯爵爾諸大臣果

能以臨行聲名為念於國家公務一意抒誠勉盡人

臣効忠之道豈惟主上嘉愛即

上天亦必憐佑報之以福矣

平定準噶爾方略前編卷十六

欽定四庫全書

史部

平定準噶爾方略前編卷二十一

詳校官監察御史

臣

孫家賢

通政使司副使

臣

莫瞻菴履勛

總校官進士

臣

朱鈐

校對官中書

臣

李斯咏

謄錄監生

臣

李亭植

欽定四庫全書

平定準噶爾方略前編卷十七

雍正五年春正月丁巳

命內閣學士僧格副都統馬拉往西藏

副都統宗室鄂齊奏言臣至西藏審察情形其
首領辦事者各不相和往往見於辭色達賴喇
嘛雖聰慧然年少不免私其父索諾木達爾扎
康濟鼐人甚有才但恃其勲績輕視諸噶卜倫

衆恨之阿爾布巴中懷陰險所行與康濟鼐殊
絕而索諾木達爾扎以娶隆布鼐二女三人為
黨恐其構達賴喇嘛與康濟鼐不和必至生事
且噶卜倫太多反增繁擾隆布鼐所行妄亂扎
爾鼐庸懦無能請予兩人噶卜倫原銜罷其職
事以翦阿爾布巴羽翼則其勢孤無作亂之人
矣乞降

旨曉諭達賴喇嘛康濟鼐阿爾布巴等和衷共事議政

王大臣等議悉如所請請遣大臣一人齎

旨往諭又達賴喇嘛母舅袞都阿喇木巴既誠心守護
應給予達爾漢號賜緞六疋奏入得

旨著內閣學士僧格副都統馬拉差往達賴喇嘛處各
賞銀一千兩

二月甲子

卹賚喀爾喀台吉塔布囊等

理藩院議奏言喀爾喀台吉塔布囊等前勦烏

梁海於和托輝特其陣亡者應加一等世襲如
例官兵受傷者各按品級給銀奏入

上從之

秋七月癸酉

西藏噶卜倫扎薩克台吉頗羅鼐等奏報康濟
鼐被殺

頗羅鼐等奏言康濟鼐與準噶爾構兵部勒諸
事藏人便之乃阿爾布巴隆布鼐扎爾鼐等約

前藏頭目於六月十八日共殺康濟鼐臣等收
集後藏兵防守駐劄阿爾布巴等復發兵來侵
為臣所擊敗今臣率兵進捕阿爾布巴等伏乞
皇上速發官兵勦滅逆魁以安西藏奏入報

聞

八月甲申

議叙從征青海土司

議叙土司從勦青海等處功雜谷宣撫使同知

班第爾吉加宣撫使銜瓦寺安撫使桑朗溫愷
加宣撫使同知銜莊浪指揮僉事魯華齡三寨
指揮僉事丹巴扎什雙岸朗柯四人並加指揮
同知銜包坐千戶桑柱等並加指揮僉事銜及
各土目土兵等賞賚有差

乙酉

增設西寧大通鎮等處官兵

川陝總督岳鍾琪疏言西寧北川口外大通川

白塔川及野馬川之策爾圖城垣營房以次告竣應設官兵駐劄臣按肅州鎮屬永固城諸營涼州鎮屬永昌諸營向以近邊設馬六步四或馬步各半今大通鎮營扼險據要肅州口外又設安西重鎮則永固等營並內地應以肅州涼州二鎮所屬永固永昌等十八營馬兵量汰九百六十并寧夏鎮標後營已汰馬兵六百共汰馬兵一千五百六十大通鎮有控制援勦之責

應如馬步各半例設馬兵一千步兵一千策爾
圖遊擊逼近邊境路通青海應設馬兵三百二
十步兵四百八十白塔川叅將與西寧北川營
相去五十里距大通鎮不過百里聲氣響應應
設馬兵二百四十步兵五百六十議政王大臣
等議覆悉如所請奏入得

旨西寧大通等處初設兵丁甚屬緊要其應添設叅將
遊擊守備千總等官著岳鍾琪於陝西武官內應題

補者題補應調補者具題調補

甲辰

定俄羅斯疆界

郡王額駙策凌等奏言臣等與俄羅斯使臣薩
瓦等相見議定疆界事宜臣以應定界趾處詳
示薩瓦云東邊額爾古納等處昔年內大臣索
額圖等與爾使臣費糧多爾等議歸爾國無庸
再議今自額爾古納河岸至阿魯哈當蘇阿魯

奇都勒齊克太奇蘭並我國斥堠所在應以相對之楚庫河為界自此以西沿布爾古特山以博木沙畢彙嶺為界定界之後不得雜處及容納逋盜等犯者互相捕治臣即與伯四格侍郎圖理琛等於當立界石處書石給予薩瓦薩瓦及布理雅特烏梁海等並心服據薩瓦云此行幸為使臣瞻仰

天顏既優賜我察罕汗復賞賚奉使人等

聖恩優渥今既矢公定界永永無渝臣等即遣侍衛瑚
畢圖郎中納延泰等與俄羅斯副使一番一番
諾費池等指定東西界趾議立界石俟其還時
即據界趾山河地名繕寫繪圖恭呈

御覽議政王大臣等議覆曰應如策凌等所議立石定
界曉諭喀爾喀汗王各扎薩克黑龍江將軍等
令其約束屬人不得越界生事違者重法治之
至於定恰克圖口為貿易所應遣理藩院司官

一人管理貿易人數不得過二百如例其京城
俄羅斯館應令修整以居使臣其國來京讀書
幼童及教習等亦令同居官給養贍願歸國者
聽之至領侍衛內大臣克什圖前遣往代隆科
多辦事今疆界已定應令來京奏入

上從之

丁未

奪蒼津爵

議政王大臣等議奏言翁牛特扎薩克多羅杜楞郡王和碩額駙蒼津奏請令策妄阿喇布坦煎茶使者入藏行走悖逆專擅殊甚應盡奪蒼津爵其郡王更請承襲奏入得

旨扎薩克多羅杜楞郡王著貝子鄂齊爾承襲
戊申

命王大臣等預撥陝西四川滿漢官兵聽調川陝總督岳鍾琪來京面領

訓旨

上諭怡親王大學士富寧安張廷玉等曰西安滿洲兵著派二千名令副都統尼瑪善預備管領寧夏滿洲兵派一千名令副都統蘇圖預備管領其綠旗兵陝西省預備五千名四川省預備三千名雲南省預備三千名爾等可行文與岳鍾琪鄂爾泰即遵照派辦管兵之官弁及應用帳房等項一有調發之處候文到即便啟行岳鍾琪現在四川著回到西安將預備

兵馬之事料理畢即馳驛來京朕有面降諭旨之處其川陝總督印務仍著岳鍾琪隨路帶辦不必委人署理

九月己未

命給康濟鼐屬人移居青海者口糧

上諭議政王大臣等曰康濟鼐屬下厄魯特等原係青海之人曾降旨與達賴喇嘛令將此等人交副都統馬拉內閣學士僧格移於青海地方居住爾等行文

與岳鍾琪將四川布政司庫銀動用一萬兩酌派官兵送往西藏交與馬拉僧格備辦口糧賞移居之厄魯特等

庚申

命罷陝西等處備調官兵

上諭議政王大臣等曰前因達鼐報稱康濟鼐被擒之信恐策妄阿喇布坦有窺伺西藏之意是以降旨令陝西各路及四川雲南各派兵馬預備以候調遣今

康濟鼎被害情由係西藏噶卜倫等彼此不睦自相
殘害之小事不須用兵著將各路兵馬停止不必預
備

命封貝子達什策凌為貝勒

理藩院奏言青海貝子噶爾丹戴青諾爾布卒
無子其妻請以姪貝子達什策凌兼襲世職按
例貝子無兼襲兩職者請無庸議奏入得

旨噶爾丹戴青諾爾布於青海羅卜藏丹津之事著有

功績因議叙封為貝子今既病故伊兄弟兩家止有
貝子達什策凌一人著從優加恩并兩貝子職晉封
為貝勒世襲罔替

冬十月癸巳

命公博爾屯為將軍查克旦為叅贊大臣率兵往阿爾
台代巴賽等

上諭兵部曰明年更換阿爾台駐防兵丁時將軍巴賽
員缺著派護軍統領公博爾屯前往叅贊大臣常色

禮員缺著派都統查克旦前往其駐防兵丁即令博爾屯查克旦會同該旗大臣預將年力精壯漢仗好可以學習成材者揀選派出令其前往

己亥

命岳鍾琪遣官往藏傳

諭駐藏大臣馬拉等

上諭議政王大臣等曰阿爾布巴差兵至阿里欲害頗羅鼐被頗羅鼐將伊所發之兵盡行截殺已領兵往

招征勦阿爾布巴此舉若能成事於西藏有益但今現有欽差馬拉僧格在藏恐伊等或為阿爾布巴所惑從中講和或被阿爾布巴等誑誘以至頗羅鼐受害則大有關係著岳鍾琪於川陝標下官員內選擇熟習番情通曉番語可以差遣往藏者速令其前往將一應情節密述與馬拉僧格俾伊等心中明白則諸事無阻此諭著學士班第送去其詳悉之處班第口傳

鄂爾昆圖拉產瑞麥

軍營効力行走原任大同總兵官馬觀伯奏言
鄂爾昆圖拉為極邊初墾地近產瑞麥一莖十
五穗上瑞殊祥希代罕觀奏入得

旨今歲各省俱產嘉禾頃馬觀伯復進瑞麥朕觀自古
聖帝賢王皆務實心實政不以祥瑞為尚朕深明此
理擯斥虛文因今歲為通行藉田典禮之初即獲感
召天和是以特為表著以明天人感應之理捷於影

金史卷之二十一
卷十一
響期中外諸臣益加誠敬共相儆勉於將來也但恐
地方有司未必深悉朕心或競尚嘉禾之美名借端
粉飾致有隱匿旱潦而不以上聞者亦未可定著將
雍正五年以後各省田畝所產嘉禾俱停其進獻奏
聞

乙巳

命塔拉圖為管理蒙古兵副都統往阿爾台

上諭兵部曰明年更換阿爾台駐防兵丁時管理蒙古

兵之副都統員缺著派護軍統領塔拉圖前往

十一月發丑

命左都御史查郎阿率兵進藏

上諭議政王大臣等曰現今西藏頗羅鼐帶兵報康濟
鼐之仇與阿爾布巴戰鬪相持應特派大臣領兵料
理曾經繕寫諭旨頒給達賴喇嘛其來年大臣前往
應帶領兵丁目今預備俟青草發萌時前去此所派
兵丁著議政王大臣等議奏從前派兵時除官賞置

辦預備恩賜銀兩外其稍有不足者多指伊等俸餉
支借今次所派官兵應停其借給著從優賞賚其料
理藏內軍機事務著左都御史查郎阿副都統邁祿
前去選派西安滿洲兵四百名隨往四川綠旗兵丁
著散秩大臣品級鑾儀使周瑛帶領陝西綠旗兵丁
著西寧總兵官周開捷帶領雲南綠旗兵丁交與鄂
爾泰酌量選派總兵官一員副將一員著留一員在
察木多駐劄一員領兵進藏周瑛賞銀四千兩周開

捷并所派雲南之總兵每人各賞銀三千兩副將各賞銀一千兩叅將各賞銀五百兩至賞給遊擊以下等官爾等酌議具奏尋議曰大臣進藏所率西安滿洲兵四百應令一協領二佐領二防禦四驍騎校轄之再調綠旗兵陝西八千四川四千雲南三千每兵二千人遣一副將千人遣一叅將或遊擊轄之守備以下令所在督撫提鎮等酌量調往並遵

旨從優給銀遊擊四百兩守備三百兩千總二百兩把
總一百六十兩馬兵二十兩步兵十六兩悉令
先期預辦俟明年青草發萌時啟行令查郎阿
於正月自京由西安西寧同周開捷出口進藏
應帶部院賢能司官四人筆帖式四人理藩院
領催二人各給俸錢整裝奏入

上從之

丁巳

命原任巡撫法敏等辦理軍營糧餉屯種事務

上諭議政王大臣等曰阿爾台軍營辦理糧餉事務已
泰雙喜之缺著派原任巡撫法敏原任內閣學士傅
德前往更換伊等到日同伊都立三人管理糧餉種
地事務効力贖罪明年大兵起程時隨將軍前往

庚午

命封哲卜尊丹巴胡土克圖等

理藩院遵

旨議覆曰哲卜尊丹巴胡土克圖請加封哲卜尊丹巴

喇嘛遣官齋捧

勅印送至喀爾喀庫倫奏入得

旨哲卜尊丹巴胡土克圖與班禪額爾德尼達賴喇嘛等之後身出處甚確應封於庫倫地方以掌釋教朕為普天維持宣揚教化之宗主而釋教又無分於內外東西隨處皆可以闡揚昔達賴喇嘛與班禪額爾德尼在西域時其居住青海之厄魯特顧實汗等實

與之鄰近相與護持故其教盛行於西藏自此各部
落俱為檀越踵而行之有年矣蓋宣揚釋教得有名
大喇嘛出世即可宣揚豈僅在西域一方耶哲卜尊
丹巴胡土克圖其鍾靈原有根源乃與達賴喇嘛班
禪額爾德尼相等之大喇嘛也故衆喀爾喀俱尊敬
供奉之且伊所居庫倫地方弟子甚衆著動用帑銀
十萬兩修建大剎封伊後身俾令住持齊集衆喇嘛
亦如西域講習經典宣揚釋教再多倫淖爾乃衆喀

爾喀歸順時我

皇考巡狩於此衆喀爾喀齊來朝覲會盟之地也因造
寺宇以表彰之俾去世之章嘉胡土克圖居住章嘉
胡土克圖者西域有名之大喇嘛也唐古忒人衆敬
悅誠服在達賴喇嘛班禪額爾德尼之上各處蒙古
亦皆尊敬供奉今其後身稟性靈異確實可據著將
多倫淖爾地方寺宇亦動帑銀十萬兩修理寬廣使
章嘉胡土克圖之後身住持於此齊集喇嘛亦如西

域講習經典以宣揚釋教蒙古汗王貝勒貝子公台
吉等既同為檀越朕如此推廣教法建造寺宇一如
西域令喇嘛居住講習經典於伊等蒙古之誦經行
善亦甚便易蓋禮佛行善無分遠近宣揚釋教之處
愈多則佛法可以日廣即哲卜尊丹巴胡土克圖章
嘉胡土克圖皆前世達賴喇嘛之弟子伊等豈肯忘
其宗派耶

丁丑

停用隨軍効力人等

川陝總督岳鍾琪疏言嗣後有自備鞍馬隨軍効力者請令領兵將軍督撫提鎮等考驗報部方予收錄兵部議覆如所請奏入得

旨隨軍効力之人往往有未諳營伍而具呈願往濫邀議叙者此等自備鞍馬之人若後來力量不足必致遲誤公事及遲誤之後又不便與衆一同治罪於軍前甚屬無益嗣後若有自備鞍馬願往効力之人俱

不必准

十二月甲午

勅諭準噶爾台吉噶爾丹策零

準噶爾台吉策妄阿喇布坦死子噶爾丹策零
嗣立遣使特磊來朝頌

勅諭一道令來使齎回奉

天承運

皇帝詔曰據奏知爾父病故不勝惋惜爾父在時將一

切事務未得裁處妥協台吉知爾父負朕之恩為非遣使遠來朕甚嘉之方今西藏地方噶卜倫阿爾布巴等與頗羅鼐等彼此結讐舉兵相拒朕正在躊躇爾奏稱欲在西域煎茶設供廣行釋教以安衆生似屬非分準噶爾乃西北隅一小部落耳釋教之廣行與否豈關爾之煎茶設供耶朕即位元年爾父奏稱寬宥伊罪言詞恭順朕以為出於至誠故欲清理疆界乃命使二次爾父反生嫌疑不能遵奉朕旨再羅

卜藏丹津乃青海和碩特扎什巴圖爾之子伊骨肉
中無故弄兵互相殘害朕差大臣前往命各息兵而
羅卜藏丹津乃敢悖我

皇考聖祖養育之恩負朕之德侵犯內境被守邊輕兵
擊敗遠行逃竄爾父應即為擒獻始見和好之誼乃
於本地隱匿窩留是何意耶由此觀之從前所奏無
一誠實之處可知矣前者羅卜藏丹津乃一愚戾不
忠不孝之人爾父年高歷練力能將伊酌量裁處可

以生之亦可以制之必不被伊愚弄是以不曾勦追
今爾年少與彼相等以羅卜藏丹津之志氣高傲不
顧恩義斷不肯屈於爾下守分安居必將離間爾等
於爾大有不便爾務須將羅卜藏丹津送來朕念伊
父扎什巴圖爾從前勞績斷不將伊誅戮仍施恩養
養爾其祇遵朕命爾台吉應將利害輕重盡心籌畫
自立主見特茲勅諭

乙巳

命將軍巴賽仍留阿爾台軍

上諭議政王大臣等曰巴賽在軍前年滿原欲換回今
王丹津多爾濟奏稱將軍巴賽常色禮辦理一切事
務管轄兵丁整飭妥協等語現有羅卜藏舒努事件
軍前甚屬緊要巴賽着再留三年着博爾屯查克旦
率領更換兵丁前往協助巴賽辦事自京城派副都
統諾穆柱速赴軍營同常色禮將兵領回

雍正六年春正月丁巳

封青海厄魯特扎薩克台吉羅卜藏察罕為輔

國公

辛未

命察罕度爾軍營前鋒統領穆克登回京

三月庚午

命巡撫莽鵠立往西寧料理進藏軍需

上諭議政王大臣等曰向來大兵駐劄之處皆有大員
辦理軍需目今進藏官兵駐劄西寧著巡撫莽鵠立

就近前往料理

命分別七種効力候補人員等次

兵部奏言阿爾台屯種候補守備等期滿請更代如例奏入得

旨阿爾台種地之候補人員如不分別等次定其優劣則伊等罔知鼓勵著行文該將軍於期滿更換之日分為一二三等具奏如果皆實心効力則皆列一等如皆係平常則當盡列下等不可因有等次遂強分

優劣以人就等務須秉公分晰開列具奏

夏四月辛巳

命議阿爾台駐兵當代者令先期至京

上諭議政王大臣等曰阿爾台換班兵丁八月內方得到彼換回兵丁俟到後起程於十一月盡方能至京時既嚴寒兵丁不無苦累如何可使換回兵丁預先起程不受寒凍即能至京著議奏尋議曰自歸化城至扎克拜達里克有上海新驛舊驛阿喇克諾

海古爾班賽堪五路若令換班兵丁於四月下旬啟行由張家口至歸化城分四路行令博爾屯查克旦塔拉圖諾穆柱分領之再令歸化城都統丹晉等選叅領佐領等官熟識道里者四人亦分路擇水草佳處導之前行約於七月下旬可至扎克拜達里克軍營兵丁先期在此候代再撥盛京吉林官兵為之哨望俟換班者至即令啟行仍令熟識道理叅領等官沿途導之

十月下旬即可至京官兵得免苦寒矣奏入

上從之

秋七月乙丑

擒獲西藏叛人阿爾布巴等

命宣諭中外

先是川陝總督岳鍾琪奏言據西藏駐劄叅將顏清如報稱二十五日頗羅鼐率所部兵自潘玉口至喀巴先發兵千人衝戰喀木卡倫與隆

布鼐兵遇是夜西藏斥堠兵並集二十六日頗
羅鼐率兵直抵西藏駐藏大臣馬拉僧格即往
布達拉守護達賴喇嘛頗羅鼐一面安撫西藏
一面發兵圍布達拉二十七日馬拉僧格還藏
二十八日各廟喇嘛擒阿爾布巴隆布鼐扎爾
鼐等以獻頗羅鼐執之來見馬拉僧格且言今
率阿里及後藏兵九千以來既獲仇讐即還後
藏防守隘口乞奏聞

皇上加賚兵丁臣竊見頗羅鼐於我兵未到之前同仇擒賊此皆

聖主威德遠布之所致但渠魁雖擒阿爾布巴之子衮布尚在江達駐劄臣即令鑾儀使周瑛嚴加防範俟大兵到藏併力攻勦頗羅鼐兵九千人請加賞賜以示鼓勵奏入得

旨頗羅鼐兵丁殊為効力著查郎阿等將預備軍需錢糧內動支三萬兩給與頗羅鼐令其酌量賞兵至是

諸王大臣等疏言阿爾布巴等殺害駐劄西藏
貝子康濟鼐罪不可赦今頗羅鼐仰承

天威率兵擒獲阿爾布巴隆布鼐扎爾鼐三人西藏
平定合詞奏賀奏入得

旨阿爾布巴等背理妄行藐視國法朕為綏靖邊陲之
計特命大臣領兵前往察究情由就近申討今據奏
報頗羅鼐率所部兵馬先抵藏地其各寺喇嘛將首
惡之阿爾布巴等三人獻出拘禁渠魁既已就擒藏

地可以寧謐在大兵不發一矢在西藏未傷一人此等大事而成功之易若此是皆仰賴

上帝之垂慈

皇考之默佑實非朕涼德之所及也因諸王大臣等陳奏將此宣諭知之

九月乙卯

命攜賚阿爾台軍代還官兵

上諭兵部曰阿爾台兵即日回京著於領侍衛內大臣

內派一人散秩大臣內派一人齋茶食於駐軍地方
設幄賜食將軍賞銀一百兩副都統營總賞銀三十
兩護軍叅領驍騎叅領賞銀二十兩官員等賞銀十
兩護軍等賞銀五兩披甲人賞銀四兩令其攜至家
中以備家庭歡聚之費

丁丑

差往西藏吏部尚書查郎阿奏以叛人阿爾布
已等分別正法

查郎阿奏言臣等統領大兵於五月初六日自
西寧出口八月初一日至西藏即同駐藏副都
統馬拉學士僧格鞠訊阿爾布巴隆布鼐扎爾
鼐等同謀殺康濟鼐事得實按阿爾布巴等身
受

國恩敢行叛逆阿爾布巴隆布鼐當凌遲處死扎
爾鼐及阿爾布巴之子噶爾丹盆楚克袞楚克
拉賈卜鄂達爾漢噶爾藏吹達爾隆布鼐之子

席木本吹扎特並當斬二逆之妻女兄弟及扎爾桑之妻并其子喇克桑扎木巴並當離本處發遣至協助阿爾布巴等諸喇嘛亦當分別治罪番人素性兇惡宜令所在目覩阿爾布巴等正法用示懲戒臣等一面奏

聞一面即取二逆及在事當斬者正法其應發遣者諸檻送江寧杭州荊州等處將軍令給予兵丁為奴奏入報

聞

平定準噶爾方略前編卷十七